

## Հ Ա Յ Տ Ա Ր Ա Ր ՈՒ Թ Յ ՈՒ Ն

Կոռուպցիայի կանխարգելման հանձնաժողովը տեղեկացնում է, որ ուսումնասիրել է Երևան քաղաքի ավագանու 2019 թվականի վերջին մի քանի նիստերը և, մասնավորապես, 2019թ դեկտեմբերի 25-ին գումարված արտահերթ նիստը՝ հանրային ծառայողի վարքագծի սկզբունքների պահպանման տեսանկյունից: Այս առնչությամբ Հանձնաժողովն արձանագրում է, որ նիստերի ընթացքում թույլ են տրվել վարքագծի սկզբունքների կոպիտ խախտումներ, մասնավորապես՝ Երևան քաղաքի ավագանու 2019թ դեկտեմբերի 25-ին գումարված արտահերթ նիստի ընթացքում հնչել են բազմաթիվ արտահայտություններ և որակումներ, որոնք համատեղելի չեն բարեկրթության և հարգալիրության սկզբունքների հետ, կոպտորեն խախտում են գործընկերների արժանապատվության նկատմամբ հարգանք դրսևորելու պահանջը: Մասնավորապես, ավագանու նիստում հնչել են այնպիսի արտահայտություններ, որոնք վիրավորում և նսեմացնում են մարդու արժանապատվությունը, օրինակ՝ «քաղաքական անասնագողություն», «բարոյական օրինաչափություններից զուրկ»՝ ընդգծելով հապավումը, մեջբերում հայտնի մանկական անեկդոտից, նշելով՝ «մարդը իր կտոհշնվի շորերը հագել էկել էր», «չեմ պատրաստվում սեղմել ձեր կեղտոտ ձեռքը», «դուք շափ փոքր մարդ եք», «դուք ոչ մեկ եք, որ հարցադրում անեք ավագանու անդամին» և այլն: Հարկ ենք համարում ընդգծել, որ վերը նշված արտահայտություններն օգտագործվել են ակնհայտ վիրավորական ոճով և խախտել են ոչ միայն գործող իրավակարգավորումներով սահմանված հանրային ծառայողի վարքագծի սկզբունքները, այլև մեր հասարակության մեջ համընդհանուր ընդունված էթիկայի նորմերը:

Հաշվի առնելով վերը նշվածը, առաջարկում ենք՝

- Երևանի քաղաքապետին և ավագանուն՝ ձևավորել աշխատանքային խումբ, որը Հանձնաժողովի հետ առաջիկայում կմշակի համայնքային ծառայողի և ավագանու անդամի վարքագծի կանոններ,
- Երևանի քաղաքապետին և ավագանուն՝ «Հանրային ծառայության մասին» 2018թ մարտի 23-ի ՀՕ-206-Ն օրենքի 44-րդ հոդվածի և «Երևան քաղաքում տեղական ինքնակառավարման մասին» ՀՀ օրենքի համաձայն ստեղծել էթիկայի հանձնաժողով, որը կապահովի ավագանու անդամների և/կամ քաղաքապետի կողմից էթիկայի կանոնների պահպանումը,
- Քաղաքական և վարչական պաշտոն զբաղեցնող բոլոր հանրային ծառայողներին, այդ թվում՝ Երևանի ավագանու անդամներին՝ պահպանել «Հանրային ծառայության մասին» ՀՀ օրենքով սահմանված վարքագծի սկզբունքները:

Հանձնաժողովը հիշեցնում է, որ «Հանրային ծառայության մասին» 2018թ մարտի 23-ի (ՀՕ-206-Ն) օրենքի 22 և 25 հոդվածների համաձայն հանրային ծառայողները պարտավոր են դրսևորել **բարեկրթություն և հարգալիրություն**, ինչպես նաև **հարգանք իրենց վերադասների, անմիջական ղեկավարների, գործընկերների, ենթակաների արժանապատվության նկատմամբ:**